

摘藻堂四庫全書薈要

集部

欽定四庫全書蒼要卷一萬九千九百五十五

集部

宋文鑑卷三十二

宋 呂祖謙 編

勅

頒貢舉條制勅

歐陽修

夫儒者通天地人之理而兼明古今治亂之源可謂博矣然學者不得騁其說而有司務先聲病章句以牽拘之則吾豪雋奇偉之士何以奮焉有純明朴茂之美而無敦學養成之法飭身勵節者使與不肖之人雜而並

進則夫懿德敏行之賢何以見焉此士人之甚弊而學者自以為患議者屢以為言朕慎於改更比令詳酌仍詔宰府加之參定皆以為本學校以教之然後可求其行實先策論則辦理者得盡其說簡程式則閱博者可見其材至於經術之家稍增新制兼行舊式以勉中人其煩法細文一皆罷去明其賞罰俾各勸焉如此則待士之意周取人之道廣夫遇人以薄者不可責其厚今朕建學興善以尊子大夫之行而更制革弊以盡學者

之材予於教育之方勤亦至矣有司其務嚴訓道精察
舉以稱朕意學者其思進德修業以無失其時凡所科
條可為永制

賜右屯衛大將軍叔韶獎諭勅

歐陽修

朕固嘉汝嚮學勵善蔚然而有文與夫習富貴之驕而
樂狗馬之翫者異矣然夫學者所以知君臣父子之禮
出可以施於國入可以施於家汝其慎擇厥師講救其
闕使言而無過以自達於悔尤夫能異於衆人誠為有

立必至乎君子然後大成汝其勉之無或中止

賜陝西西路沿邊經畧招討都部署司勅

宋 祁

朕卹軍旅之苦寵邊陲之良事從優寬情無違愛至於
常愆細過並許功除煩文苛法罕由吏議昨滕宗諒張
亢並緣事任合給公用庫錢俾其宴享賓僚犒飫軍伍
而乃用度無藝簿領失防陽託貿營潛有牟入攸司言
上遣使即推如聞逮繫頗多鞠効彌廣本其冗費寧足

深誅已罷案窮悉令原貸其滕宗諒等止免一官量降
差遣雖屈吾法期慰士心且夫盡用市租美推趙將來
從我取誼表漢臣每慕前風大體尚慮諸道帥守便以
茲事為懲或損狹餼牽或裁量藥餌苟存畏避謂免譏
彈胡益至公亦非朕意但當循經費之式去自潤之私
取仰於官均惠於衆由茲底績夫何間然安節坦懷毋
或疑憚

罷諸路同提點刑獄使臣置轉運判官勅

劉 敞

國家兼覆寓內疆理天下分州立邑十有八路惟吏之不平民之失職政之頗顗獄之糾紛未能獨察也故設糾虔之司使奉欽恤之寄專屬朝案貳以武吏誠欲審疑察枉釋寃決滯納民於不寃流化於無訟而武吏或起世家或由軍功文墨期會未必深究監司背項適增其繁夫非其習而望其效違其方而冀其功不亦難乎其罷諸路同提點刑獄使臣令樞密院勘會已及二年

者即令赴闕未及二年者與就移合入差遣及於河北河東陝西緣邊兵馬多處相度添置路分都監以次補用庶幾人盡所長官不虛受夫轉運使之任所寄耳目治財賦集事功也江南東西荆湖南北廣南東西福建益梓利夔等十一路此其去京師遠者萬里近者數千里或跨帶山海崎嶇蠻夷而皆一員主之處則無與參慮出則無與僇力設有緩急之警調輸之煩機會一失民受其敕甚非豫慮先事之策其各增置轉運判官一員

以三年為一任選差第二任以上知州資序人候一任
滿日與提點刑獄差遣初入知州及第二任通判資序
人候滿兩任日與提點刑獄差遣若居部無狀隳職敗
事亦重行其罰蓋士常患任之不當其材無以見長用
之不乂其任無以就功今朕別異文武使得自試擢
賢能使得次進吾於士大夫可謂無負矣其各竭力悉
心勉成功名布告中外咸諭朕意

復天下州縣官職田勅

張方平

昔在先帝詔復公田合王制班祿之差得聖人養賢之義載原深旨本自愛民比者搢紳之間屢陳利害之意以謂郡縣受地有無不齊銓審除員權利為倖辨競以之傷俗因緣至於害人故嘗命官斷以定數誠足釐於浮弊然未安於予懷禮不云乎厚祿以勸羣臣則下之報禮重凡厥文武仕於朝廷雖廉素者惟士之常而富貴者人之所欲其全寬大之體自有公平之制所宜給其所未給均其所未均約為等差槩令增足使事父母

者得以致其養畜妻子者得以致其樂冠昏喪祭有所
奉慶恤饋問有所施不牽私室之憂必專公家之慮則
六計可以弊羣吏之治四方可以期衆職之修儻自犯
於有司亦何逭於曩憲上廣先朝之惠示不敢渝下俾
諸臣之言審茲自定惟爾中外體予所存

條制資蔭勅

張方平

周禮大司樂掌學政以六藝教郡國子漢制光祿勳典
任籍以四行察三署郎茲其官材本於世胄然當辨論

必屬俊良今廕法之所原古典刑之是憲惟因循之日
久寢滋蔓而倖多敝生作法之涼濫起推恩之過且賞
延于世諒非及於疎宗官惟其人顧何取乎髫髻暨階
仕進之路復無誨育之科室不茨墉田不疆畝處不裕
立身之道出不閑從政之方畧觀貴途良鮮舊族此則
上因朝廷法制之不立下自父兄訓義之不孚故俾宰
司詳為定令使夫冢嗣先錄以篤為後之體支子限年
以明入官之重設考藝之格激之向學立保行之條勉

令率履前史不云爵祿者天下之砥石人君所以礪世磨鈍茲實用焉庶乎位有稱職之才朝多濟世之美非惟為國造士是乃為臣立家咨爾具僚知朕此指

皇族出官勅

蘓頌

粵自我祖宗惇敘邦族大則疏封於爵土次則通籍於閨臺普集京師參奉朝請然而世緒寢遠皇枝益蕃屬有親疎則恩有隆殺才有賢否則祿有重輕今而一貫於周行是亦奚分於流別雖睦婣之道誠廣而德施之

義未周故廷臣數言宰司繼請謂宜定正限以等彝朕
惟親戚之間經史有訓漢唐之世典故具存或以九族
辨尊卑或以五宗紀遠近或聽推恩而分子弟或許自
試而効才能或宗子之賢得從科舉或諸王之女自主
昏姻盡前世之所行顧當今之未備况我朝制作動法
先王豈宗室等衰反無定著因俾羣公之合議將為一
代之通規載攬奏封具陳條目以謂祖宗昭穆宜從世
世之封王公子孫抑有親親之義若乃服屬之既竭洎

于才藝之並優在隨器以甄揚使當官而勉懋至於任
子之令通昏之儀凡曰有司之常一用外官之法僉言
既允朕意何疑告於將來遂頒明命噫自義率祖既殊
升降之文因時制宜斯盡變通之利咨爾宗盟之衆固
多博識之倫奉承新書當體朕意

赦文

建隆登極赦文

五運推移上帝於焉睠命三靈改卜王者所以膺圖朕

起自側微備嘗艱苦當周邦草昧從二帝以徂征洎虞
舜陟方翊嗣君而篡位但罄一心而事上敢期百姓之
與能屬以北敵侵疆邊民罹苦朕長驅禁旅徃殄穹廬
鼓旗纔出於國門將校共推於天命迫迴京闕欣戴眇
躬幼主以歷數有歸尋行禪讓兆民不可以無主萬幾
不可以曠時勉徇群心已登大寶昔湯武革命發大號
以順人唐漢開基因始封而建國宜國號大宋改周顯
德七年為建隆元年乘時撫運既叶於謳謠及物推恩

宜周於華夏可大赦天下於戲革故鼎新景命初隆於
王室眚災肆赦鴻恩普洽於民心更賴將相王公協謀
同力共裨寡昧以致升平凡爾萬方咸知朕意

嘉祐明堂赦文

王珪

朕承三聖之基履四海之貴深惟持國之日久益念為
君之道難有臨聽之勤庶以圖天下之佚無奉養之靡
庶以資天下之豐兢兢萬務之惟微勉勉前事之所戒
倚以左右輔弼之正予敢有弗欽事於上下神祇之明

予敢有弗肅屬九穀登富三辰昭華象來梓海之祥塵
絕玉闕之警有邦之應於朕豈功恭念為天之子者必
修報本之禮為人之子者必懷追養之慕重循菲德屢
緝曠文頃按明堂之圖古如路寢之制載經斯室載度
斯筵直大火之驛芒乘季秋之肅氣物無上帝之稱非
躬祠不足昭虔虔聖維文考之尊非嚴配不足盡虔孝
於時備法物之駕服大冕之章格靈貺於真庭款清德
於太宇還祇宗祀之舉具飭純誠之將迺神光陸離燭

于薦鬯之夕喜氣休晏被于燎柴之時亶丕事之繼成
敢蕃釐之專嚮宜孚廷渙以契天心可大赦天下於戲
承神之胙既均輝翟之微盪俗之瑕復若風霆之布蓋
禮鉅則擇之博孝至則勸以遐尚賴秉文之英經武之
傑厲同寅於王室壯大治於邦圖共荷無疆之休亦膺
無窮之聞

治平立皇太子赦文

王珪

王者承天立極莫不思長世之圖為國建儲所以正萬

邦之本故朕親先父子而天下皆以為愛命發朝廷而天下不以為私粵予上嗣之良稟自日躋之聖出而就傳寢窮學肆之聞入則承顏勤至寢門之間比疏榮於王社益侈德於天枝顧荷丕基之艱猶虛正體之貳矧漢文命嫡著於即祚之初年且夏后立子期以傳家於萬世維羣元之所徯維大器之所承式符少海之祥宜踐東朝之位肆顯冊之丕發嘉僉言之大同爰契歡心用覃曠澤可大赦天下於戲文昭武穆夙詒燕後之謀

震長離明本有承華之象蓋義重序先者禮必亟舉慶
施乎上者惠必遐流咨爾庶方當體朕意

熙寧七年南郊大赦

元絳

王者欽崇神天嚴奉宗祏就郊以饗所以詔天下之恭
假廟而烝所以教天下之孝洪惟五聖之烈誕輯百王
之文肆予冲人昭事上帝載念物無以稱維一誠可以
展大報之儀祭不欲煩維三歲可以述躬行之典協會
康年之順道迎至日之長是用朝薦殊廷裸將太室乃

進登於陽時以裒對於皇穹合祀地祇陟配文祖祝禋
告潔贊犧尚純六樂變音舞奏而諸物至二精揚燎煙
升而萬靈交方丕事之獲成敢蕃禧之專饗宜專大號
以賚多邦可大赦天下於戲意盡精裡既秩宗祈之舉
政施惠術亶昭慶宥之行維時黎元綏我德澤尚賴謨
明肆近忠藎群材儀圖新策之宏勩相隆平之運同底
于治永孚厥休

元豐立皇太子赦文

鄧潤甫

父子一體也惟立長可以圖萬世之安國家大器也惟建儲可以係四海之望位序蚤定而人莫不以為悅典禮亟崇而衆罔敢以為私永惟上嗣之賢實有妙齡之譽入而視膳孝友見於夙成出則好書聰哲繇於自得粵紹休於正統猶虛位於東朝迺考著龜之占迺稽方冊之實載涓吉日肇闢青宮周家先親不敢忘廟社之重夏后與子益以順天之心宜覃曠恩徧暨群品可大赦天下於戲離明震長繇帝緒於億年解吉渙亨灑

天仁於萬物益禮之所行者大則澤之所流者深咨爾
多方體朕至意

冊

乾德上尊號冊文

范質

維乾德元年歲次癸亥十一月己酉朔十六日甲子攝
太尉守司徒兼侍中蕭國公臣質守司空平章事臣溥
尚書右僕射平章事臣仁浦及内外文武臣寮馬步諸
軍將校藩郡守臣四夷君長縉黃耆艾等七千五百人

謹再拜稽首上言曰惟天為大惟堯則之又曰舜有天
下無為而理是以古之言道德者莫先於二帝一則曰
聰明文思一則曰溫恭濬哲英聲茂實意無欲而自彰
景福鴻休心無求而自至巍巍蕩蕩無得而言伏惟皇
帝陛下高明博厚宣慈惠和純粹之德全孝友之行著
惟精惟一知微知章向者龍尚處於潛淵日未離於暘
谷歷試之際志在扶危險阻艱難何往不濟躍馬蹈高
平之陣麾戈佐淮甸之征喋血鏖兵一月三捷勞旋飲

至論功莫二洎乎天監厥德用集大命人祇叶應風雨
咸若鼎運初建國步猶梗始則李筠犯順長戟指闕并
人連禍寇我北鄙於是有太行之行重進怙亂棄德崇
姦幅員千里生民被毒於是有廣陵之役千乘萬騎如
霆如雷詢彼仇方震疊區宇翠華宵至堅城旦下連平
二孽有同符契累朝已來出師誅暴未有若茲之奇速
也頃者華風不競中國政微五嶺三江置諸度外殊文
異軌六紀於茲肇啟聖謀驅攘寇亂荆湖底定南土晏

然燕薊之戎汾晉之孽燕巢幕上朝不謀夕邊事少間
理道無壅嚴恭寅畏一日萬幾勤於已而恭於人儉於
躬而豐於物明四目而高視達四聰而遠聽不侮鰥寡
恤天窮也信及豚魚遂物性也惜力念耕耘之苦推食
閔介冑之勞法家之流既峻且密乃詔大理重正刑名
俾盡哀矜務從寬簡減盜竊之罪緩鹽麴之禁好生之
德通於神明若乃昧爽丕顯坐而待旦商湯之戒慎也
側身損已長轡遠馭漢文之化導也循名責實信賞必

罰建武之法制也果敢決斷從善如流貞觀之風烈也
帝王之道於茲備矣太平之業於茲成矣於是祇見清
廟致其孝享圓丘展禮對越上玄一獻而天帝降祉再
獻而神人以和三獻而萬祿攸報祥風拂袂休氣繞壇
熙熙怡怡群心胥悅國家大慶衆庶共之肆赦覃恩俾
民更始與天合道謂之應天大無不覆謂之廣遠無不
至謂之運博施濟衆謂之仁智周萬物謂之聖化成天
下謂之文保大定功謂之武其德無際謂之至德臣等

不勝大願謹奉玉冊玉寶上尊號曰應天廣運仁聖文
武至德皇帝伏惟垂日月之明鑒億兆之情凝旒端委
昭受鴻名如山嶽之固如松栢之貞乾健不息品物咸
亨承天之祐萬壽千齡

封祀玉牒文

維大中祥符元年歲次戊申十月戊子朔二十四日辛
亥有宋嗣天子臣敢昭告於昊天上帝啟運大同惟宋
受命太祖開階功成治定太宗膺圖重熙累盛粵以冲

人不承列聖寅恭奉天憂勞聽政一紀於茲四隩來暨
元貺殊尤禎符章示儲慶發祥清淨可致時和年豐群
生咸遂爰荷顧懷敢忘繼志僉議大封聿伸昭事躬涉
喬嶽對越上玄率禮祇肅備物吉蠲以仁守位以孝奉
先祈福逮下侑神昭德惠綏黎元懋建皇極天祿無疆
靈休允迪萬乘其昌永保純錫

尊皇太后冊文

歐陽修

維治平二年歲次乙巳十一月丁巳朔十有六日壬申

嗣皇帝臣某謹稽首再拜而言曰臣聞昔者明王之以
孝治天下者非家至而日見也蓋有要道焉推所以行
於已者為天下率盡所以奉其親者為天下先而四海
靡然而承風矣洪惟有宋受命造邦百年四聖而小子
獲承之以繼我仁考之遺休餘烈方與羣公卿士夙夜
以思勉其不逮庶幾如我仁考付畀之意以申罔極欲
報之心此固慄慄祇懼不敢遑寧者也顧惟眇末之質
提携鞠育慈仁咻煦至於有成自我聖母嗣位之始哀

迷在疚而憂勤艱難一日萬務協和綏靖保佑扶持功
施邦家亦惟我聖母永惟至恩大德無物可稱是以稽
參典禮率籲羣心合志一辭懇懇惓惓不勝大願謹遣
攝太尉具官韓琦司徒具官胡宿奉玉冊金寶上尊號
曰皇太后恭惟皇太后聖善明哲柔閒靜專粵自正位
中宮內助先帝陰禮修而教行儉德著而下化遂及萬
國先於正家逮夫玉几受遺遭時多難勉徇勤請權同
聽決而明識遠慮動懷謙畏深鑒漢家母后之失訖不

踐於外朝及歸政冲人合於易之進退不失其正之聖
是惟全節鉅美固已超出前古而垂法後世宜乎盛烈
播於聲詩尊名光於典冊惟末小子獲奉溫清嗚呼殫
九州之富以為養未足盡於孝心享萬壽之福而無疆
期永承於慈訓臣誠懼誠抃稽首再拜謹言

皇后冊文

王安石

維熙寧二年歲次己酉四月丁酉朔二十六日壬戌皇
帝若曰自昔有天下必擇建厥配以承宗廟以御家邦

肆朕受命奉循前烈考慎典冊以祈協於神民咨爾向
氏懿柔淑恭舊有顯聞肇功惟祖弼亮帝室流德之澤
覃延後嗣是產碩媛比賢姜任越朕初載來嬪蕃邸盟
饋在中率禮無違以至嗣服祇承內事齋明夙夜罔有
曠失宜崇位號表正宮庭今遣攝太尉推忠協謀同德
佐理功臣樞密使光祿大夫檢校太傅行尚書刑部侍
郎上柱國東平郡開國公食邑五千戶食實封一千戶
呂公弼攝司徒朝散大夫右諫議大夫參知政事護軍

太原郡開國侯食邑一千一百戶賜紫金魚袋王珪
持節冊命爾為皇后夫惟興王釐厥士女咸自內始達
於四海朕克勤人用弗怠朕克儉人用弗奢朕克正人
用無敢側頗僻爾勸相朕乃濟登茲於戲匪初惟艱惟
慎厥終爾忱念茲朕以永享天祿爾亦豫有無疆之福
豈不韙哉

仁宗皇帝加上徽號冊文

王珪

維元豐六年歲次癸亥十一月壬寅朔二日癸卯孝孫

嗣皇帝臣謹再拜稽首言曰臣伏觀古先格王莫不大
名發於前而大惠昭於後其法皆本於至公而不可易
至後世臣子又欲盡報上之道以謂君德甚盛其言不
足以包衆美於是有至郊加誅之文夫欲推事存之禮
述追遠之志則奉素享之榮號益新紀之鴻烈謀群公
請太室洋洋庠際天接地而震顯之不亦當靈心而傳
古誼乎恭惟仁宗神文聖武明孝皇帝躬清明之資賦
神睿之畧乾行施之不息仁性根於自然時乘六飛端

御大器知窮八荒而不見其迹澤及萬彙而不居其功
爾乃簡拔峻賢放遠邪佞宥恕刑獄懷保鰥寡賞不徇
所私罰必當於理興農桑之本務緝禮樂之隆文有慘
怛好生之心吏或誤入重辟必終身見斥有寬裕從諫
之度言者屢進狂直必曲意見容念兵革之傷夷則不
殺而服念稼穡之勤勞則罔寧於勉矧履天下之尊而
持之以抑畏饗天下之富而寶之以儉素輿馬不聞於
游盤鐘鼓不涉於閑燕宮室亡奢靡之飾器服亡瓌奇

之玩加以夙夜齋栗事天之誠盡霜露怵惕念親之感
深方朝廷之久安迺大革因循而聖政又新為社稷之
重計迺前定禍亂而皇嗣早立故四十二年仁恩川流
涵濡熏烝格於上下日月華風雨均四時飭百穀蕃北
有獷狁而不能驕西有黠羌而不能軼蟲魚遂性自安
川藪之游男女潔誠更趨耕織之樂固有幽遐荒昧之
俗不約而子來奇偉倜儻之瑞不効而特見者矣丕赫
哉憲度鴻明聲文沛施自載籍之傳益未有休功盛業

可加於茲也重循涼菲永念猷訓今將款清廟陟紫壇
遂受厚福以浸黎元宜於此時臨彤庭發玉版上不敢
隳祖宗之典下不敢虧神民之情如堯如舜如禹如湯
豈不高一世之聞而流萬世之聲哉爰飭上儀載揚景
鑠謹遣銀青光祿大夫守尚書左僕射兼門下侍郎上
柱國太原郡開國公食邑七千六百戶食實封二千五
百戶王珪奉玉冊玉寶加上徽號曰仁宗體天法道極
功全德神文聖武濬哲明孝皇帝恭惟明德在天臨受

徽稱維億萬年永錫嘉祉謹言

立夏國主冊文

王珪

維熙寧二年歲次己酉三月戊辰朔十四日辛巳皇帝
若曰於戲昔堯合萬邦而民風和周建列土而王業楙
若古申命蓋國家之成法也咨爾秉常迪性純一飭躬
靖虔生稟山川之靈舊傳弓鉞之賜撫有西夏尊於本
朝知事君必盡其節知守國當保其衆乃內發誠素外
孚誓言質之天地而不欺要之日月而不昧朕用稽酌

故典表顯徽實錫爾以茅土之封不為不寵加爾以車服之數不為不榮涓辰既良備物既渥誕舉丕冊以華一方今遣朝奉郎守尚書司封郎中上輕車都尉賜紫金魚袋劉航文思副使銀青光祿大夫檢校太子賓客兼御史大夫騎都尉彭城縣開國伯食邑七百戶劉愔持節冊命爾為夏國主為宋藩輔夫履謙順者靡不膺長福懷驕肆者靡不蹈後虞率身和民時乃之績往欽哉祇予一人之彛訓可不慎歟

皇后冊文

李清臣

皇帝若曰天相予祖宗茲歷世寧康朕既敬紹丕緒罔
作麗觀底信內外惟式蕝以正邦今左右弼臣禮儀正
貳暨族老宗婦各虔厥事咸鋪繹舊聞明敷於位曰乾
施坤承日照月儷四時不忒萬物用成盡稽則象詢考
卜筮若時元吉正名錫服俾長首六宮以母天下予惟
國有故常是何敢弗率咨爾王氏乃祖忠勞王家書於
太史子孫公侯出入藩服惟功澤逮茲是碩媛淑嫕溫

恭備有嘉德聘歸王邸入承事皇姑靡不若禮上天右
序予家蚤育元子慶在宗廟惠賚於四方乃以某年某
月某日遣攝太尉具官某攝司徒具官某賜爾皇后之
寶方寸有半文盃螭紐授之王冊厥簡五十命爾翟衣
笄纚博鬢黼領大帶以朝暨歲時將祀於東西宮金輿
朱蓋武賁禁衛步障行道是惟顯哉爾其克后職思后
道履中體順茲日饗多福集大祐於厥躬其尚攸助予
治昭聞於無窮於戲懋戒之哉

仁宗皇帝哀冊文

韓琦

維嘉祐八年歲次癸卯三月癸卯朔二十九日辛未仁
宗神文聖武明孝皇帝崩於福寧殿旋殯於殿之西階
粵十月戊辰朔六日癸酉遷坐於永昭陵禮也龍馭賓
天珠襦留殯萬方之軌同臻七月之期茲近法仗已嚴
靈輜未進風雲慘鬱以生悲臣妾涕號而思殉孝子嗣
皇帝臣某接統承堯念親希舜徘徊象物驚禁從以
如存摧慕僊游致哀誠兮必盡繫臨奠以長辭蓋終天

之永恨乃命弼臣以文傳信其詞曰惟宋受命與天無
疆藝祖以武底寧四方神宗以文萬邦一王真廟紹隆
赫然其光逮夫仁宗益熾而昌厥生之初上帝惟祐天
日之表振古未覩色出圭璋步嚴龍虎其俾真人來綏
下土元良之建七鬯是主寢門之問惕若文武嗣訓之
循纂承丕緒左右獻言以蒙自處大運歸乾獨化陶甄
進良黜姦始章聖權其仁如天其度如淵其仁伊何得
之自然草秀而茁蟲飛而翔尚不忍傷况吾民焉惠澤

之需滂洋幅員物無不滋四十二年猗如天兮化功則
全其度伊何汪然莫際巨細必容默分誠偽臣在言職
不知諱忌時肆詆訐衆嫉狂易聖心怡然曰此忠義是
也吾從過焉何戾猗如淵兮是能致治明慎庶獄極於
哀矜惟法所在未嘗妄刑郡邑之吏責之詳平一失入
罪無階顯榮尊為天子以儉為貴崇尚清虛屏斥紛麗
向緣不憚輔臣入視殿幄蕭然茵衾故敝率用繒素了
無文綺衆曰驚嗟上曰何喟吾之受用素止如是此民

膏血烏敢妄費恭事天地孝承祖宗九見圓丘再祇合
宮大祫於廟親藉於東服器精備粢盛潔豐小次不御
東圭顒顒何必戶曉民胥偃風取士之路務存至公十
二臨軒策之必躬雋髦盡得巖穴幾空有將有相曰功
曰庸眇視三代吾其比崇北方之強西夏之獫時欲跳
梁恣其貪嗜吾以威懷折其凶銳兩皆搖尾從我羈餌
百蠻梯航琛賁日至禮樂具修干戈不試夫惟立嗣天
下之基前世令王或牽以私事前定瀆於亂危我出

獨斷挺然不疑求賢於宗唯聖是知神器之重其傳有
歸廟社以安生靈以嬉迹其大公堯舜之為昔在人上
必有偏好或樂馳逐或喜征討或務宴游或專營造或
邇聲色或泥丹竈基奕之工擊拂之妙有一於此下從
而效噫吾仁宗澹無所樂曰吾好者在勤政道日必盥
具惟先之紹閒時弄翰或隸或草墜帚之揮千奇萬巧
去冬之暮清燕之間再闢天閣詔呼從官親作飛白侍
臣縱觀心合造化生成筆端書幅踰百大均寵頒退坐

群王行觴盡歡嗚呼哀哉賜墨尚濕宸章未刊植璧斯
虔遽有金縢之禱綴衣遂徹俄承玉几之言嗚呼哀哉
大變之來天傾地裂四海之慟風號雨血兆民震駭其
無生百辟冤呼而欲絕乘雲之游兮汗漫而自高持顛
之慕兮僵仆而徒切因疑前會之非常似與群臣之叙
訣嗚呼哀哉候律云凜諏辰協元嚴蜃路以方駕視羽
幢兮始前池竹搖雉車旗飾鸞背朱雀之通達指青龍
之古山關路長兮去復去宮車晚兮還不還痛徹六宮

兮莫知逝淚灑重瞳兮胡可攀嗚呼哀哉寒日晝昏愁
陰夜積卷晴霓於丹旒蕩霜波於素帟悲笳互咽六州
之奏增悽駿嶽前瞻萬歲之聲何聞大隧一局幽堂永
寂人間之恨空長帝所之歡豈極嗚呼哀哉秦漢而下
御邦子民夏越三紀纔聞數君其間治亂以相駁否亨
之不醇加仁宗享國之久而始終太平兮彼安敢望吾
之清塵生而無窮者厚載健而不息者高旻惟至仁盛
德與高厚之俱兮萬世巍然而不泯嗚呼哀哉

宣仁聖烈皇后哀冊文

代宰相

畢仲游

維大宋元祐八年歲次壬申九月三日癸酉大行皇太后崩於壽康殿旋殯于崇政殿之西階粵明年正月遷祔座于永厚陵禮也叢殿帝空祖庭燎晡雲似卻而復凝月雖輝而如慘孝孫嗣皇帝臣某臨遣莫以興哀瞻振容而永慕鳳吟管以何悲龍挾輜而若駐羽衛羅闕神儀布露爰制近司紀陳聖度其詞曰皇矣大宋寶命自天重明累聖跨成軼宣正后在中契於坤乾較任命

比姒亦逾于前有系自姜源深積厚功熙我朝方虎是
偶奄韓宅魯益昌厥後月瑞日符是興太母於鑠太母
躬義率仁居靜猶地舍和如春正素自稟聰明夙聞作
合英祖齊昇並曜受養神考陰功善教體道不違惟德
是微元豐末命帝命惟辟聽斷勉同以補天隙擁佑神
孫立民之極恭以勵人儉惟化俗衣有大練奩無片玉
房闥不出四海在目信義由中九夷思服如鑑不塵如
璞不緇三事大夫正直是咨宗藩外戚滲漉惠慈人爵

王官雖卑不私廟謁靡行外朝靡踐池籩靡臨惟正是
勉服御靡更惟惡是善庸爾萬方為則為典左右皇躬
動有壇宇居由範防造次于是寢隆且昌如天清明霽
日之光治化方成憂勞亦至外若平居中潛邁厲坤軸
軋以夜摧月輪翩而曉墜守大化之靡怛尚斯民之為
意嗚呼哀哉珠箔低垂兮雲霧猶隔蕙帳髣髴兮爐煙
未銷想仙馭以何適謝人寰而已遙萬乘號慟哀纏九
霄千官縞素雨泣東朝嗚呼哀哉人與神兮變何速秋

復春兮時以徂犧樽盈兮未忘於平昔池綽動兮難留
於湏臾翼八翬以為衛陳六衣而汜塗嗚呼哀哉野蒼
茫兮人漸遠仗徘徊兮天欲晚遡洛澗兮嗟脩物之如
往逾輦岸兮知神遊之不返山川已兆於真宅松栢猶
凝於故苑嗚呼哀哉玉晦龍蟄金藏鑑昏泉關掩夜宮
闌泣晨車軌同兮雖來於萬國寶座閉兮惟朝於百神
魚惟炬以非日鴈長飛而不春嗚呼哀哉成內則於三
朝貽素風於十祀致理之勤兮今已往大道之公兮古

如此何遠其家以為國而憂其民之猶子宜大書而作冊俾永光於宋史嗚呼哀哉

欽聖憲肅皇后哀冊文

李清臣

粵建中靖國元年辛巳歲正月壬戌朔十三日甲戌大行皇太后崩於慈德殿二月壬辰朔十一日壬寅殯於西階以三月壬戌朔八日巳巳戒百官請命於太廟謚曰欽聖憲肅皇后太史筮之將以五月辛酉朔六日丙寅遷座于永裕陵禮也哀子嗣皇帝臣某極永感之

懷寫無窮之慕躬薦洞酌奉寧輶馭痛三牲之養忽至
於遣奠悲萬壽之祝俄成於晞露聲咳如在聲容不返
畢銅史之餘滴動金商之清挽暑令忽其成淒薰風颯
其變慘像設既嚴物儀具有惟是冊書用傳不朽官臣
承詔式虔事守紀漸寓哀貽之永久其詞曰我宋隆康
恩漸動植遠惟暨邇生成滋息趨走賢智修官懋職遐
及四裔左衽重譯維相向公梁棟宗祏逮女曾孫迨家
瑞國蚤歸王藩旋被褫翟至性溫溫令儀翼翼道意禮

學生知自得慶壽寶慈問安昕夕執養寒暑端莊不易
內輔神宗贊助陪益凡厥見聞舒徐啟迪十有九年晏
粲椒掖萬邦託慈六宮仰式約省外氏湯沐脂澤斯世
丕平陰與多績比懿夏商塗山簡狄姜嫄太姒聯袂並
鳥元符三祀歲執徐直正月己卯變同割耆巍巍哲宗
武威文德夫何弗祐忽邁窀穸上嗣考廟將決大策于
時弼臣或藏邪慝輒進異論欲倒白黑賴我聖母沉潛
剛克折之陛前氣殫語塞庭羅犀渠門屯闔戟德見利

人寰宇慶懌一指顧間長寧社稷譬如媧皇神工妙力
鍊石補天斷鼇立極冲融宇宙滉瀟滂滌靡賢不登靡
冤不釋臣嘗侍對與聞訓敕曰我皇帝聖材天錫子道
勤必政事祇惕治本亂原講磨紬繹惠心溥博物理研
覈帝堪多難子復明辟何俟祔饗始還禁闕幸濟初艱
後罔餘責重下教告亟就安適帝板以留懇款襁積數
請弗回推璽郤籍義盡今茲事高往昔在漢馬鄧固多
慚色其於邦民憂不離臆動履仁儉示先壺則服無珠

璣器無瑤碧禁戒彫繪棄捐組織言祖經墳智該儒墨
諸書過眼疑微洞析兢兢瞿瞿殆忘寢食涼暄密移疹
氣侵蝕皇帝聖孝啟處在側藥審刀圭術窮鍼石禴禳
山川猶期千億丹劑雖靈冥筭終厄佛供晝昏喪氛夜
赤祲象告凶軒星示圻數圯坤元景淪望魄五十八載
馳光度隙嗚呼哀哉梓匠奏工嬪娥罷飾帳殿光途殯
堂撤席縞士鼎鼎絳旌奕奕左背城闕右經阡陌馭騎
趨趨綈車叩噫簫笳悲吟鹵簿哆赫萬類奪輝四民聚


戚御服苴麻皇情欒棘嗚呼哀哉霧雨故宮莓苔舊城
鳳幌蕭森獸扉虛寂輦路鑑奩孰非陳迹引望山園涕
濡竹栢惟有徽音長留寶冊嗚呼哀哉

宋文鑑卷三十二

謹案第二十頁後二行鄂特凌古舊作阿里骨今

改後仿此





總校官庶吉士 臣 張能照

校對官助教 臣 蔡 鎮

校對官中書 臣 胡紹基

謄錄監生 臣 羅善慶

謄錄監生 臣 熊夢祖

欽定四庫全書薈要

集部

宋文鑑卷三十五

三至

詳校官候選知縣臣吳甸華



欽定四庫全書薈要卷一萬九千九百五十六

集部

宋文鑑卷三十三

宋 呂祖謙 編

御札

大慶殿恭謝御札

歐陽修

勅內

外文武臣寮等執珪璧以事神嚴祖宗而配帝雖

有國之常典亦因時而制宜朕承三聖之丕基撫萬邦
之有衆儉于已使天下之民豐勞於心致天下之民佚
因敢怠忽庶幾治平而首春以來偶興調適賴三靈敷

祐百福來臻順以節宣獲茲康裕加以邊隅不聳風雨
以時雖庶物之咸和顧眇躬而增惕是用稽先朝之成
憲詢故實於有司即廣殿之翼嚴擇靈辰之良吉式伸
昭謝以格純休宜示先期俾茲誕告朕取今年九月內
於大慶殿行恭謝之禮其今年冬至親祀南郊即宜權
罷所有合行諸般恩賞並特就恭謝禮畢一依南郊例
施行至日朕親御宣德門宣制仍令所司詳定儀注以
聞務遵典禮勿俾煩勞咨爾多方咸體予意故茲札示

想宜知悉

熙寧元年南郊御札

王珪

有天下者莫重上神之報為人子者莫嚴宗廟之承率躬三歲之祠常候一陽之應緬慕先聖先施冲人載循禋類之期適在諒陰之際大懼不能備飭儀物奉將粢盛於是刺六經之文傳博士之議皆以謂喪有以權而順變祭無以卑而廢尊矧稽參西漢之曩公景德之制顧予涼菲賴帝况臨遂卜天正之辰往修郊見之禮

方且進祈茂祉以大芘黎元昭格至精以終圖熙事庶
幾能饗其敢憚勤朕以今年十一月十八日有事於南
郊咨爾攸司各揚厥職諸道州府不得以進奉為名輒
行科率其百司除事神之物並宜一切仍舊外餘應于
供奉所須務令純約以稱朕不忘孝思之義

熙寧四年大饗明堂御札

元絳

勅内外文武臣寮等朕荷二儀之休履四海之富經庶
政之至治秩將禮之彌文欽惟五聖之謨常躬三載之

祀自續隆於大業已肆類於圓丘興言總章未詔嘉饗
維仁祖之武宜謹於遵修維文考之尊宜嚴於陟配况
萬寶時楙三光仰澄官師協恭方夏底定是用稽仍路
寢之制涓選肅霜之辰上以裒對天明展昭事之重下
以救厲民志示遣養之勤特戒先朝以孚大號朕取今
年季秋擇日有事于明堂其今年冬至更不行南郊之
禮所有合行諸般恩賞並特就祀明堂禮畢一依南郊
例施行至日朕親御宣德門宣制咨爾攸司各揚厥職

諸道州府不得以進奉為名輒行科率務循典故無致煩勞

批答

賜除宰臣文彥博讓恩命批答

歐陽修

省表具知朕躬儉約以先人而生民未足勤憂勞以勵政而百職多隳豈布德之不明抑任人之弗至是以齋居正慮先志後占鑒屢易以為煩念難知之可慎永惟商周之所記至以夢卜而求賢孰若用縉紳之公言從中

外之人望卿以舊哲比嘗相予惟宇量能寬以服人惟
純誠故久而益信勲德兼著可以重朝廷忠信不回可
以臨大事夫謀於其始而既審則果於必用而不疑汝
其欽哉朕命無易所讓宜不允仍斷來章

賜新除宰臣富弼讓恩命不允批答

歐陽修

卿有憂國愛君之心而忠以忘其已有經邦濟時之學
而用未究其能夫畜久而積厚則施之不窮慮深而計

熟則謀無不獲茲朕所以虛心仄席有望於卿也矧卿
正直不回庸邪素忌小人所異君子所同是以在外十
年而左右之譽不及履躬一德而縉紳之望愈隆朕內
決於心外詢于衆敢謂有得卿其何辭

賜宰臣富弼乞退不允批答

歐陽修

朕眷惟宰輔之司實繫朝廷之重職或非稱勢因易搖
比以連年厭於屢易或用人之不審致厥位之靡安故
於圖任之初尤極精求之意而議者謂卿有天下之譽

慶朕得非常之才豈惟斷不惑於予心固以慰久鬱之人望則朕之用卿者至矣卿之自待者如何而方沃嘉猷遽形退讓駭無因而及此曾莫諭於乃誠豈廊廟之崇責重者其憂難任而富貴之至位高則其慮易危邪朕嘗厯考往昔之人其於進退之際過計而圖全者未必無患忘身而徇國者固多令名惟爾之明必知所擇宜少安於崇職用深體於倚毗

再賜宰臣富弼乞退不允批答

歐陽修

夫知人之明可謂難矣而任賢之術茲豈易哉若乃聽之不聽信之不篤施設之方未盡弗極其材遲速之效有時莫能少待則被其任者實亦艱歟卿以純一忠亮之誠蘊宏深遠大之業朕虛已以聽推心仰成至於一二之臣是惟同德下逮衆多之論曾靡間然方將甄叙賢愚修明法度務究本根而更治不求歲月之近功期於有成茲乃予意奈何中道而將止夫亦奚託以為辭矧上下既交寧有不通之志而君臣相遇豈為易得之

時當體余懷勉安厥位

賜宰臣富弼乞解機務不允批答 歐陽修

夫宰相之事非可以歲月考而一二數也其在朝廷選
賢任能而各得其職下俾民俗遷善遠罪而不知其然
至於法度修紀綱正然後相與慎守而安行之以臻于
治此朕所以虛心一意日有望於卿者也今事有緒而
卿辭焉豈朕德之不明將顧時之不可中道而止夫何
謂哉俾予獲用材不盡之譏而卿涉苟安自便之計予

所不取卿其勉焉

賜宰臣文彥博乞解重任不允批答

歐陽修

夫知其人之为賢任則勿貳事其君而有道去不可輕
此古之臣主之明舉措必慎所以收功於一時而垂法
於後世也卿夙有時望為予柄臣自復秉於國鈞僅三
周於歲序若乃進退賢否誅賞罪功每於聽納之間敢
忘虛已顧彼搢紳之論曾靡異辭方期有成以副予意

而乃過形謙損思避台衡豈寡德弗明於用才而不盡將多言害正致厥位之難安苟異於斯夫何引讓矧卿忠信之節足以叶予之一心材謀之優可以斷予之大事茲所眷注寧煩諭言

賜樞密使宋庠讓恩命不允批答 歐陽修

朕以因時致享克展於孝思已祭受釐大均於慶澤乃眷耆明之哲實予體貌之臣肅臨事之有容既交神而蒙貺宜推異數以示眷懷雖嘉好謙曷止成命

賜杜衍讓恩命不允批答

宋 祁

比虛右弼以湏峻望卿清約忠壯華皓一節出入諷議
靡事不為挺然公實見於有政朕志先定成命惟行况
萬幾處可百職修理朕所倚辦卿宜知之遽閱讓函猥
徇謙慤且誕告群方不容顓辭久曠台路便廢撝遜欽
服寵章

賜賈昌朝讓恩命不允批答

宋 祁

卿曩侍經筵已知國器歷守京邑則風績早樹進領邦

憲則威名流聞揚休山立自處中道朕以為履正識敏
材任輔佐引與機政參貳台司曾是踰年休有成效觀
德則懿俾謀則臧斷自予志冠升樞省誕告百執初無
異言猥露奏封深存撝遜况訓諭已熟典命難淹速即
欽膺以光朝舉

再賜杜衍讓恩命不允批答

宋 祁

向以戎醜尚桀師伍留屯公私之匱不可貲省又官濫
於外吏欺於中苛察過當爭競成俗濟水無益治絲愈

焚圖所振整未知厥序以卿久在樞禁習總事經年耆
識茂盡悴事國是用選自予志對秉台衡藉敏材以康
調發之難褒介節以懲進取之弊朕既寡德方茲仰成
尺奏荐聞能讓猶固已嘗批喻宜體眷永毋煩費詞早
膺寵典

賜陳執中韓琦讓恩命不允批答 宋 祁

朕比執珪幣祇事神祇至誠所向鴻釐如答是以推行
天祚沛流茂恩徧錄侍祠之勞悉從進律之典卿卓有

成效協於僉言而臨榮引讓稽恩未拜閱露章而既孰
非公論之所期便可欽膺即廢謙執

賜皇弟允迪讓恩命不允批答

宋 祁

朕敦睦懿親差次寵典年長者崇爵屬近者尚恩眷爾
忠賢用加節制公言期協朝渙既頒何執常謙欲遂素
守道風雖亮允令難稽往哉惟諧毋或煩請

賜皇長子淮陽郡王免恩命不允批答

王 珪

昔我祖宗誕受天命厥惟艱哉克正皇猷丕懋乃績以
遺我子孫無疆之休今朕纂厥服惟稽古建爾元子于
有邦乃季秋辛亥羣公庶尹罔不祇朕言于廷爾乃陳
德弗及期畀于一二弟兄之賢我聞曰立愛惟親立敬
惟長其敢示天下以私辱汝惟往哉尚迪時命無違
賜皇伯祖承亮改封秦國公免恩命不允批答

王珪

夫戚藩之建王室是毗古者皆世襲其封近代或別予

之邑既非祖烈之服又失廟祠之傳故朕推近屬之長
賢修先王之舊履以太子孫不絕之序以均宗社無窮
之休適覽露章過彤冲節宜體親親之意庸光繼繼之
圖

賜宰臣韓琦已下乞立壽聖節宜允批答

王珪

赤制告圖肇承題序青煒動陸俯協誕期卿等過稽舊
章列上芳牘緣華封之素祝建壽聖之嘉名竊惟受天

元符撫國休運百辟稱觴而在席四夷奉幣而在廷敢以菲懷仰于輿望

賜宰臣韓琦已下尊號不允批答 王珪

朕獲承大統三載於茲蒙天之休海內清靜方將飭齊輅潔純犧以祇見天地宗廟之靈乃敢昭發丕冊揚徽垂鴻以自施虔尊榮者哉不圖執事之臣列上表功之號且臨政之日淺未有盛烈之章况事神之意恭豈在彌文之飭適增予媿難徇所陳

賜宰臣韓琦免恩命不允批答

王 珪

夫王者壹天下之俗宰相遂萬物之宜故君臣同德而
教化成朝廷上賢則分職治肆朕承邦之久得卿共政
之均且國用失浮規節財力之匪易吏塗過冗甄序名
品之為難歷勤勞之百為蹈夷險之一致向屬冢卿之
缺適登台席之元稽卜神謀孚言朝聽維百辟之是式
維兆民之是瞻奚興曲讓之辭殊匪大公之舉慊然衆
志鬱於予聞益德盛而位隆者望雖與歸然任劇而責

至則事當隨決思體睠毗之異祈收撫固之情徃代天
工母留邦渙

賜宰臣曾公亮免恩命不允批答 王珪

夫天文中階之象色正則二氣均國柄三事之司體公
則萬化緝朕何嘗不寤寐邦傑彌綸政機以敦美風俗
之源以甄序官師之品所繫甚大維材之難卿行足以
厲朝謀足以經國代言二禁而號令鼓序羣動賦政中
畿而神明炤于宿姦頃陪議於宰臣旋冠謨於宥省邦

之維度靡不舉兵之紀律靡不張屬上台之進賢宜右
弼之膺寵忽起舜庭之讓未施鄴國之規羣情鬱然予
心勞止矧夫付安危之幾則望豈云淺當名器之分則
處之勿疑所期廣猷慮以同寅會精神而輔力當抑謙
風之固往調大化之元豈朕之獨致太平亦卿之與有
令聞

賜韓琦免明堂恩命不允批答 王珪

予臨路寢之上曾覽八紘邈然有通神明之志迺季秋

宗祀既右上帝亦右文考始予齋精臨獻而懼不勝及
觀夫簠樽在堂鍾石在庭至陟降上下之數與夫九州
四海美物之薦罔不具飭噫何其禮之盛歟非爾元宰
之臣孰總裁剴之故已降之制為百辟先亦皇天降休
命於我家非予之所敢專也今書固辭顧不廢予惠術
之施庠

賜郝質免恩命不允批答

王珪

國家提萬兵之勁萃之畿中謀元帥之良獲于巖下矧

卿嘗從征伐之事加有宿衛之勤宜授鉞於師壇總環宮之夜拆蓋旌勞者必異其寵御衆者必予之權毋為過兢其服重委

賜宰臣富弼乞退不允批答

王珪

朕肇履邦圖每恭天戒屬初災之在序偶時澤之弗滋且正於近畿顧民災之未遠然應不旋日知人事之已修卿還來相予居位未久奚抗章而引咎將援故而辭權雖蹈夫聖賢遠覽之思殆戾於君臣交儆之意勉規

弗及終底於成

賜歐陽修乞退不允批答

王珪

夫與政之途蓋天下之責至者叢矣顧雖智勇不能以
禦流訾之來前日御史加非於卿朕惟其辭甚悖於義
理之文今讒者放而疑者釋卿猶欲以去位豈朕所望
焉傳不云乎禮義不愆何恤人之言其起眎事毋重朕
之不敏也

賜宰臣韓絳免恩命不允批答

元絳

卿方重淳深清明端亮閱文武之二枋曠謀猷於百為
屬者羌種跳邊王師淹戍徃視方畧以宣威靈嘉維爾
忠蔽自朕志絕軼前代比登冢司扶世澤民將倚調於
元化靖兵戡亂猶佇建於膚公况維渙號之孚已穆廣
朝之聽胡為懇牘欲避隆名雖難進之風自高冲尚而
仰成之屬殊拂顧懷趣宜欽承毋重撓固

賜宰臣韓絳已下上尊號不允批答

元絳

朕聞唐虞之世君臣吁咷相與敕戒以康庶事未聞其
自耀功德大為名稱以動天下之聽朕以涼菲獲承皇
緒固已極崇高之位號矣嚮者奉郊宗之祀三事大夫
亦屢以徽冊來上而愧不敢從方且嘉與衆賢夙寤晨
興以營極治之業要之萬世建無窮之基亦有無窮之
聞不猶愈於虛名歟臣之尊君義則勤至朕守弗奪毋
煩數陳

賜皇伯宗諤免恩命不允批答

元絳

卿爵齒兼尊德名參劭佑予郊廟之事克有夙夜之勤
疇勞策勲時乃舊典往承成命無用勤辭

賜陳升之免恩命不允批答

元絳

卿久服樞筦協成王功屢陳誠辭願解幾政方建將旌
之重寄且增台路之華流輔成萬幾嘗宣左右之力兼
付二枋宜旌文武之謨即當欽承安用冲挹

賜宰臣王安石已下乞御正殿復常膳不允批答

元絳

垂象之變咎在朕躬內惟菲涼敢不祇懼避朝損膳欽天之渝神休震動銷去大異而三事庶尹咸造在庭願復舊常至於再請且星隆晷德猶賴交修况天畏棐忱固當屢省弭裁嚮福其庶幾焉

賜劉摯辭免恩命不允批荅

蘇軾

政如農耕以既獲為能事言如藥石以愈疾為成功若耕不獲疾不愈朕何望焉所以用卿者非以富貴卿也勉卒成業何以辭為

賜太師文彥博乞致仕不允批答 蘇軾

卿出入四世師表萬民無羨於功名而有厭於富貴其所以忘身徇國捨逸就勞者豈有求而然哉凡以先帝之恩生民之欲也卿之在朝如玉在山如珠在淵光景不陳而草木自遂去就之際損益非輕昔西伯善養老而太公自致魯穆公無人子思之側而長者去之卿自為謀則善矣獨不為朝廷惜乎藥餌有間時遊廟堂家居之樂何以異此

再賜太師文彥博乞致仕不允批答

蘓軾

朕修身以承六聖虛已以聽四輔而法度未定陰陽未和民未樂生吏未稱職中夜以思方食而歎雖不敢以事諉元老實望其以身率百官卿猶未即於安孰敢不盡其力此聖母冲人之本意而天下有識之所望也昔唐太宗以干戈之事尚能起李靖於既老而穆宗文宗以燕安之際不能用裴度於未病治亂之效於斯可見

朕意如此卿其少安

賜宰臣呂公著乞外任不允批荅 蘇軾

夫以才御物才有盡而物無窮以道應物道無窮而物有盡凡今之患所乏非才以卿篤於愛君必能建長久之策澹然無我可以寄枉直之權二年於茲百度惟正事既就緒民亦小康至於微疾之屢攻亦高年之常理卿其良食自輔為國少安譬如止水之在盤豈復勞心於鑒物心且不勞而況於力乎

賜宰臣呂公著乞致仕不允批答 蘇軾

宰相不自用人主不自為予欲識人物之忠邪故以卿
為水鏡予欲知利害之輕重故以卿為權衡苟明此心
雖老猶壯與其輕去軒冕獨善其身孰若優游廟堂兼
享其樂益敦此義勿復有云

賜司空呂公著免恩命不允批答 蘇軾

夫國以得人為彊如猛獸之衛藜藿以積賢為寶如珠
玉之茂山川湛然無為物自蒙利故崔公發議則淄青

慙服知朝廷之有人蜀使抗詞則孫權回顧歎張昭之
不在得失之效豈可同日而語哉朕之用卿意實在此
國計之重可無復辭

賜右僕射范純仁免恩命不允批答

蘇軾

自昔先帝之世屢歎材難及朕嗣位以來專用德選雖
爵祿名器出於獨斷而長育成就實在群公長短不遺
輔相之責苟無為國養人之意必有臨事乏使之憂朕

用慨然當食不御思得英雋之老共收文武之用惟卿
篤於憂國明於知人灼見朕心宜在此位往任天下之
重母事匹夫之庶

賜門下侍郎孫固乞致仕不許批答

蘇軾

吾不出帷幄臨御家邦實賴股肱之良以持綱紀之要
於其進退顧可輕聽之哉卿頃自近藩擢貳東省本以
年德之故非有筋力之求若夫正顏色出詞氣使人望

之而忠誠可信鄙倍自遠斯可矣豈以一病未能造朝
遂欲舍而去哉誠請雖勤於義未也

賜劉昌祚免恩命不允批答

蘓軾

卿國之虎臣帥我爪士總章大祀宿衛有勞宜為六軍
之先以承大賚之慶辭而不有殊匪吾心

宋文鑑卷三十三